



الهيئة العامة  
لقصور الثقافة

إقليم القاهرة الكبرى  
ثقافة القاهرة

# القصيدة مصر

شعر

عبد العزيز عبد الظاهر



892  
Z







الهيئة العامة لقصور الثقافة

إقليم القاهرة الكبرى

وشمال الصعيد الثقافى

فرع ثقافة القاهرة

# القصيدة مصر

وقصائد أخرى

أشعار بالعامية المصرية

عبد العزيز عبد الظاهر

رئيس الإقليم

سيد عواد

مدير عام الفرع

سمير حسني

الإشراف الإداري

منيره بسلال

روكسيه راشيد

صالح فستحي

مدير التحرير

د. مصطفى الضبع

مستشارو التحرير

د. عبد الحكيم العلامى

د. عبد الناصر هلال

سيد الوكيل

تصميم الغلاف

سعاد عبد الله



## الإهداء

=====

إلى روح أبى المقاتل المصرى  
الذى قاوم بالسلاح الاحتلال الإنجليزى  
وخاض معارك التحرير عامى ١٩٥٠ - ١٩٥١م  
فى مدينة السويس

- أحب بقاع الأرض إلى قلبى -  
وإلى روح أمى أول من تغنى أمامى  
بالسيرة الهلالية

فتعلق قلبى بهذا الموروث العظيم  
وأصبحت أحد مريديه

فقدمت ما قدمت للمسرح الشعبى

إليهما أهدى القصيدة مصر





# القصيدة مصر

وجاني "سيد" في المنام "درويش" ومحسوبك .  
على جسمه مشدود الوتر ..  
وخيوطه من توبك .  
وهل بدر أكتمل ..  
شاييل أمل مولود .  
ودق على عودي .. انكسر .  
قال : فنكوا مغشوش .  
خلوا الكلام سندسى  
ع الوادى توب مفروش .  
واللحن يشرب م العرق  
والحيطة تتكلم  
خللوا الكلام ع الوجع ..  
يألم ما يتألم ..  
لو مصر كانت دربكم ..  
كان فنكم علم .



يسعد مساكى سماكى مرصعة لولى .  
ونخلتين ف العلالى ف عنىكى قالولى :  
بتحب مين يا واد ؟  
دا انت البعاد هذك .  
أنا حى لسه هنا ..  
قاعد على ضى .  
يفرق الحكايات  
رحمه على اللى فات  
واقف فى وسط الناس  
مستنى غيب جى ،  
يعني معايا فى ميقى ..  
ومعايا فى حى .  
يسعد مساكى ..  
سماكى ع المصاطب نور .  
كل السواقى تدور ..  
ما تروى عمرى البور .  
انا كنت شاعر زمان ..  
أيام ما كان قدمى ..  
يمشى الخطاوى دموع ..



تروى الدموع همى .  
أضحك ولو محزون .  
وأنفخ دخان لعقاب .  
واسمع من الكتاب ..  
ترتيل ملايكى الصوت .  
وارمى السلام مليون ..  
لمن يقابلنى .  
خاصمنى فىكى كثير ..  
واصعب ما خاصمنى :  
أنك نكرتبنى .  
مع ابن طفلك وبمه ..  
محتاج تدفينى .



كان لي زمان أمين ..  
واحده أخذتها ..  
والثانيه جوا العين ..  
ياريت ترددها ..  
وتردى بس المسا ..  
لوشفتي مكتوبي .  
وتمشي ايدك في ايدى ..  
ولو تعيدى القول :  
يكون الديك بدأ يدن .

.....

.....

حبك عليه انكتب ..  
من يوم ما ولدتنى ..  
أمى ست الكل ..  
على فرن دار ستي .  
أخذت منك لون ..  
واسم مهما يكون ..  
لازق على جسمي .



يسعد مساكى ..  
نماكى ع القلوب لبلاب .  
لوغبت تانى يالحبيب ..  
لعمل سريرى باب .  
وقف وقدمى ع التراب مطبوع ..  
كأنى م الأوليا ..  
أحوارى يسوع .  
وانده عليكى ترجعى ..  
وكفايه قلبى م الغياب موجوع .



يسعد مساكى .. سماكى :

زى نيل رقراق .

الدمع منه انهمر ..

فوق الغيطان مشتاق .

لوضاق عليه الكون ..

تكفينى أحضانك .

دا احنا ولا العشاق ..

لحظة ما نتقابل .

ويدوب بلمسة ايد ..

ألاقى العيد على بابك.



في حبك انتي يا حبيتي..  
بنقلب مجذوب .  
وبدوب كأني فص ملح ..  
ف بحر مش محدود ..  
بتدرو شيني ... بتخطفيني  
بتسرقيني م الوجود..

.....

مع إني عارف ..  
مهما حبيتك أنا..  
عمرى في زمانك يا حبيتي ...  
عمر مش محسوب ..



لأني منك ..  
وانتي فيّ ..  
وامتددا للأبد ..  
لأن اسمك اتعبد ..  
لأن فيكي السر وفي ذاتك مدد ..  
واللي منك يتولد .. ولد :  
ولا كل ولاده بتصبح يوم بلد ..  
ما الدنيا مليانه ..  
ويا ما العته تاكل ف الهدد ..  
إلا انتي لسه .. وف شبائك ..  
تتحبي وتربي وتشقي وتعجني ..  
إطمني ..  
حتى الخلود ..  
لأبد بعدك يتفني .



بحب فيكي البنت مصريه عفيفة النفس ..  
من أصل الأصول .  
ونا لما احب :  
الشعر بيخضر حقول .  
وافضل أقول ..  
وكأني ع النول بنسجه .  
وبهندس المعنى ..  
وبلضم في الشعور .  
بتنفس الكلمه ..  
وبحلم بالزمن مسحور .  
تكبر حبتي وغصنها يفضل يطول .  
الشمس ورده في صدرها ..  
والأرض من تحت القدم كوره .  
وأحلى صورته لشعرها في السما طائر ..  
وفي آخر الشعر اللي تاير في الفضا ..  
تضوى النجوم .  
وتعوم في بحر الكون ونا ..  
في الحلم بغسل في الهموم .



يا ريتنى من أهل الخطا .  
يا ريت اغمض يا حبيتي ..  
والقى نفسى باللقا موصول .  
سونسرت ..  
احمس ..  
إخناتون ..  
عبد العزيز ..  
ولا فيش زمن مفصول .  
لكن نا عصفور ..  
الريح أكل ريشه ..  
وكل جيشه في الفضا ..  
ضربة جناح مكسور .



كلام الوصل يا عمرى ..  
في جبل الحب متسلسل ..  
ومتوصل بشريانى .  
وآه يا نفسى من بعدك ..  
ومن قربك ..  
دا من نورك ..  
ملت من حكمته حفاى .  
يا تخدينى ..  
يا حتجبنى مع شمس الصباح بكره .  
وتوب العرس رُماني .  
ولا حقل شريك فيكى .  
ولا حقل عذاب البعد من تانى .  
دا آه يانى ..  
يا مصر الصورة والفكره ..  
يا دنيا في لحظة تسعدنى ..  
وطول العمر تعبانى .



بحبك موت .  
وصوت السكه ف ودانى ..  
وقطر يفوت .  
غفير لبدہ على كتافہ لفع نبوت .  
وبنت بنوت بتعاجب ..  
بشرطه عين بتتعلق مع الحاجب .  
وواد بيقدم الواجب على المفروض .  
ومسعود بيتخانى مع الشيال على الأجره.  
وخضره القادره ولاده ..  
بتهادى بقوام باع ..  
وتحمى الفرن ف التاسع .  
وباب الدار كبير واسع .  
وحمل سباخ بيتدلوق على الرياح .  
وميت مصباح بيتهزوا ف زفة شوق .  
ولعب الأول والنطه وزق الطوق .  
ولبة جاز على السلم ..  
ووناسه قصاص الباب ..  
ورقاصه وقرداتى وناى الغاب ..

وكتاب "البراجيلى" ..  
"وبسم الله" على نغمه نمر الراس ..  
وتخلص سورة "البقره" وسورة "الناس" ..  
ونا لسه ..  
دماغى الطالع النازل بميت احساس ..  
بيتعلم حروف الشوف ..  
وف عيونى جبال الماس ..  
تشع فى بكره وتلون جدار روحى ..  
ويطلع سرى من ذاتى لذاتى ييوح :  
(ف دمك اسمها السامى ..  
وف حروفه بيتقدر خطاوى الروح )



يا نور الكون :  
دا مهما يكون بعيد عنك ..  
أنا منك .  
أنا نخله على نيلك .  
أنا نجمة ف سواد ليلك .  
أنا نغمة في مواويلك .  
أنا موجه على بحرك .  
أنا حصوه ف حصي أرضك .  
أنا إنتى .. أنا هوه .. أنا هى .  
أنا سرك .. أنا سحرك .  
أناديلك .. أغنيك ..  
أخطي الخطوه ف ضميرك ..  
أكون ليكى .. تكونيلى ..  
أعيش فيكى تضمينى ..  
في احضانك .. ف احضانى ..  
يشب الشوق ف وجدانى ونامعاكى ..  
أمد جذورى فى حشاكى ..  
ونتهد بقولة آه ..

نقول الله .

.....

ويطلع إبتنا لبكره ..

يحط الفكره ع الفكره ..

وينيكى بلا عتمه وعبوديه

.....

يا ريت اقدر اكون نفسى :

أكون مصرى ..

وانتى تكونى مصريه .

.....

أراهنك لو تقوليلى سنينك كام ؟

دا كرم أعوام على أهرام ..

على علما على شعرا على حكام ..

تاريخ مادد ف بطن الأرض ..

وجذوره إذا انخلعت ..

تهد الكون .

.....

ومين مجنون حيحسبك .

ومين مجنون ميحسبهاش ..



لا عمرك عدى بالساهل ..  
ولا كنتى .. ولا تكونى .. ولا تبقى ..  
دا كله بلاش !!؟  
لا قبلك كان على الدنيا ..  
ولو هيكون زمن بعدك ..  
عدم ولا جاش .

.....

دنا وانتى الوجود كامل بلا نقصان .  
واحلف إن لولانا لا كان ولا كان .

ولو كان الزمن ناسى ..  
ووقت الشده بنقاسى ..  
دى غمضة عين ..  
ف بحر زمانك الواسع بلا شيطان .

حلمت كثير :  
بنا وانتى على نورج ..  
ف ليلة صيف .  
في ايدك سيف ..  
وف عيونك حمام ابيض بيتناجى ..  
أليف ووليف .  
ونا جنبك ..  
لكنى كائى جواكى .  
بلغلف شوقى بهواكى .  
وأشوف حسنك على غصنك ..  
سؤال ف الخلا مطروح ..  
بحبك ليه ؟!  
حقولك إيه ؟!  
عشان إنتى حبيبة الروح .



ويتهادى ف جرن القلب موالك .  
ويتمادى لآخر العمر طول صبرى .  
ويخرج م السبل شعرى :  
أغانى تنطق الإمري .  
يزقزق ع العيدان عمري .  
أنادى ....  
يجونى أولادك وأولادى ..  
يهلوا بريحة الوادى .  
ويترصوا على دريسك ..  
وف ايديهم فوانيسك .  
على كتافهم مداريهم .  
أداريهم عن الحساد .  
واجمعهم على دربك .  
واحس بقلبك النابض يرج الكون .  
وبصحى من ربيع حلمى ..  
على أملى .. على ألى ..  
ولاقىكى بعدتى بعيد .

النيل ف قلبي قنا .  
وناع القنا غناى .  
والناى ف ايدى صبا ..  
حبا ف الغيطان رواى .  
يحكى يا مصر المصطبه ..  
والأهل والخلان .  
والضحكه ترس انفلت ..  
من مطرحه رنان .  
طاير في قلب الفضا ..  
بينادى ع الانسان .  
( احزان كثيره مطحليه ..  
والحب .. نيل عطشان )



وناف الطريق صارى ..  
بجارى الريح .  
وادارى م الهوا شمعه ..  
وكام دمه ورا الأجفان .  
(حنانك فين !!  
وفين الدفه والشيطان ؟  
أمانك فين ؟  
وفين التوته والسندان؟)  
أقابل موجه تعبانه من الرحله ..  
ونا تعبان .  
وطعم الغربه في دروبك على لسانى ..  
أذانى كثير .  
وورائى الطريق لافف ..  
بيتلوى كما التعبان على المزامير ..  
وأيامى بتطوح كما ريشه لآخر البير .

و لنا طير المساراجع بلا جناحات .  
سبع سموات بدور فيها ..  
وبطويها سبع مرات .  
أشوفك ف العلا نجمه .  
أشوفك ف الربيع زهره .  
أشوفك في الوجود حكمه .  
وأشوفك في الادان صلوات .  
وأنادى باسمك الحارس .  
وبسم الله ..  
أشوف فيكى الأمل طارح على بابك ..  
رايات النور .  
ويطلع صوتك الصافي ..  
كنيل مسحور .  
يقول ف الفضا الواسع :  
معانا الله .



ونقول كلامنا للزمن ..  
يا مصر منخبيش .  
ولا ننكسف من نفسنا ..  
إكمن ..  
ضاع الريش .  
القط لو خططوه ..  
برضك ..  
ميقاش ثمر .  
والسبع لو يسخطوه ..  
وسط السبوع حيعيش .

وحتفضلى ..  
وصدقنى حتفضلى ..  
برديه فوق النيل .  
(لا للنخيل تقربى  
ولا ع الرمال بتميل)

وحنكتشف :

بعد ما يفوت الأوان .

(إن جدران الهرم ..

من صخور أسوان)

ولا فيش فراعنه ..

أو قراعنه ..

أو بناء الجان .

(وان اللي كان ..

واللي حيكون للأبد ..

فيه مصر واحد .

واللي بنى جبل الحجر:

مصرى وكان إنسان)



يا مصر لازم تعرفى ..  
قلب الوفي مصباح .  
دي الشمس ديما تختفى ..  
مش كل وقت صباح .  
ويا ما شفنا كثير عفن ..  
ف الأصل كان تفاح .  
ويا ما شعله بتنطفى ..  
من نفخة المداح .  
بلاش تخافى وتهربى ..  
من مشرط الجراح .  
لازم يا عمرى تعرفى ..  
ولو عرفتى تصطفى ..  
ولو اصطفتى تنصفى .  
مش كان دفه ف بحرنا ..  
كانت في ايد ملاح .  
ولاكل من مسك العصا ..  
قالوا عليه رماح .

اللي بنى مصر ..  
كان ف الأصل حلوانى .  
على كتفه أنا شبيت ..  
وف حجره ربانى .  
علمنى لما ن كبيت ..  
إزاي أقوم تانى .  
علمنى أحب الناس ..  
وكلامه في ودانى :  
مصر هيه البشر ..  
مش أرض ومبانى .

إلى روح الشهيد مدين الطوخى  
من شهداء معارك التحرير بالسويس  
(ديسمبر ١٩٥١)

القطر فات ..  
ساب البلد بكثير ..  
هديت فلنكات الخشب .  
بردت مسامير الحديد .  
رجعت الأصوات عاديه .  
(سمفونية الضفادع والديوك)  
والفجر توب مشبوك ..  
على حبال السما .  
والنجم كان ييموت .  
وعلى الرصيف :  
كان التابوت محطوط .  
ولا صوت بشر ..  
إلا نحنة الغفير وال(ها) ..  
وبعض أصوات الكلاب ..  
وبعض آه .. مكبوت .



مدين ياناس ..  
كان في الأساس ..  
فلاح ف شيلنجه.  
ولما ضاقت عليه..  
نزل السويس عسكرى ..  
ف السكه والقطرات .  
على كتفه شاييل بندقه..  
متصدش دبانه .  
مرسوم عليها التاج ..  
والصنع بريطانى .  
(آخر بقايا موقعه  
وصاحبها كان مهزوم)

مدين حياته كلها..  
في القطن والدوده .  
(وبعوده يا سيدى إبراهيم)  
قضى السنين سوده .

ولما أصبح عسكرى ..  
ممشيش على الموضه ..  
لاحظ رجله في شمال ..  
ولا ف اليمين جوده .  
ويوم ما جاله الشريط ..  
من فرحته يقول :  
ياسعدى يا هنايا .  
قال له الشاويش يا هناك ..  
لكن يا سعدك لأ .  
مفهمش مغزى القول .  
لكنه مع طول السنين ..  
عرف طريق الحق .  
ولا وفد كان ينفعه ..  
ولا سياسة الشق .  
إلا بماسوره عقوره ..  
طولها يدوب شبرين .  
منها يشوف بالعين ..

مدخل ببيان الصدق .

الموت على الطرقات ..

ماشي بيتسكع.

كانه واد بلطجي بيسروخ الثبوت .

ونا ابن ست سنين ..

أيام تكعبلنى .

وأيام في عز الليل ..

الشمس تحضنى .

أصحي وأقوم مفزوع ..

على صوت رصاص الخلاص ..

وصوت رصاص الموت .



في كل يوم الحريم..  
مع موجز الأنبياء :  
عن لحتلال والداء .  
وعن فلاته .. العسكرى ....  
والكامب والرايش ..  
وعن فدائي لقوه..  
مدفون لكن عايش .  
وفي لحظة يدوى الرصاص ..  
ينهد مجتمعهم .  
ويبدأوا في الصرخ ..  
ومين حيسمعهم.  
ف الكهف حكام البلد..  
والكلب رابعهم .

من بعد ساعة زمن ..  
والموت يبتمشى .  
شدتني امي ف دارع ..  
والثاني فيه رعشه .  
تجري وأنا خطوتي ..  
خطوة صبي كاشه .  
راحين لفين يا مه ؟!  
-اسكت يا واد انكتم .  
ودموعها خافها ..  
أشد رجلى م التعب ..  
ونا بجري وياها .

ف السكه محنش وحدنا ..  
دى الخلق ويانا..  
كورس يقول يا ربنا..  
والتانى يا ستار .  
واحنا الصغار فى الرجول ..  
الزحمه وخدانا..  
تايهين فى ايد الأمهات ..  
والضلمه عميانا.  
الناس كتير واقفين ف الساحه تستنى .  
وناس بتتمنى الحياه ..  
لناس لها الجنه .



قال اللي واقف جنبنا..  
وكلامه كان فكه:  
لنجليز ضربوا البوليس..  
وعساكر السكه .  
ودبت أمى صدرها..  
والجاره وياها .  
لثنين جوازهم عساكر ..  
والثوره وخداها .

وفجاء صوت رعد انطلق :

-الورى ع السكه .

الا وكل الناس اتجمعوا في نقطه .

مع كل جثه ينزلوها تمشى مجموعه.

صوت البكا كان للسما..

والدمعه نازله م الدما..

بالقهر مشفوعه.

امي تشب بنفسها..

عايزه تشوف الجاى .

لحد ما سمعت صوت ..

معرفش كان ازاي .

- مدين ياناس .

واترمت ع الجثه جارتنا ..

وناس حارتنا اتجمعوا..

وشالوها شيل وياه .

ولقّنتى واقف وحيد..

يلحس لسانى العنيد..

دمعه ورا دمعه .

.....

.....

اتنين تمرجيه عتاه .

واقفين على اللورى .

واللورى مليان بالجثث .

فيها اللي مات موة بطل..

واللى انضرب ف قفاه .

فى الصبح كان التابوت ..  
على بلده مترحل.  
بدون موسيقى الجيش ..  
وبدون عجل مدفع .  
صندوق خشب مترين ..  
والزوجه والبنتين..  
والقطر مستنى .  
رايح فايتنا لمين ؟  
سؤال جوابه انتهى ..  
مع مدين الطوخى .



( يونيو ٦٧ )

أنا وانتى كنا لوحدنا.  
فوقنا السما ولعه.  
بلعت حناجرنا الكلام ..  
وودانا مش سامعه.  
وايدنا بتفك الحزام ..  
على وسط رقاصه.  
وعنينا بنت الكلام ..  
ع القلعه بصاصه.  
(عفريت علاء الدين ..  
حبسينه ف الزلعه)

(يونيه ٦٧)

الراديو يقول المحيط ..

ويا الخليج ثاير.

ف الوش:

ناس متأسفين .

ف الظهر:

بتعاير .

(يونيه ٦٧)

الحلقه من قبل المسا..

ف السيرك منصوبه .

تلت أسود واقفين ..

بيصيفوا طوبه .

والخلق قدام الحديد ..

خايفه ومرعوبه .

طرق لسان كرباج ..

خللى الأسود هاجوا .

زعق الكبير زعقته ..

اغمزت الخيمه .

اسد صحيح .. معتبر..

بنشوفو ف السيمه ..

قدم عروض مذهله ..

محبوكه التيمه .

الحلبه من بعد المسا..

خاليه من القاعدين ..

تلت أسود ف القفص ..

ويا الكلاب نايمين .

(يونيه ٦٧)

الشط حط القلوع ..  
متبهله م الريح .  
شراع بيسند شراع ..  
ويلقلف المجاريح .  
والقلب من كتر العفن ..  
غسل الألم بالقريح .

(يونيه ٦٧)

يا حبيبتي سكتنا هنا.  
ليه ترمحي لبعيد ؟  
آخر حدودك أنا..  
طول م الهرم موجود..  
والنيل بيشر بدمعتك ..  
ويخضر المواليده.



(يونيه ٦٧)

وانا تحت قنديل المسا..  
سكران بلا خمره .  
وعنيه متشعلقه في ضفاير القمره .  
رجليه متدلله..  
تحتى ف فراغ مجنون .  
وعيون غريقه مبحلقه ..  
ف اللى اتشنق ف الكون .  
بحلم برحلة خلا..  
في عيونك الحمرا .  
على ترعه سوده معكره..  
والشمس واقفه ف حلقها..  
(تمساح بلع جمره)

(يونيه ٦٧)

ونا تحت قنديل المسا ..  
مسطول بلا حجرين .  
بين البنين مركون ..  
على حيطه بغدادلى .  
خاليه من الدقشوم ..  
والرمل والسدايات .  
بحلم برحله للأبد ..  
ف الننى والمجهول .  
لو أطول أجيبك يا زمن ..  
قدامى متقيد ..  
لا خلى عبد العبيد ..  
يعمل عليك سيد .  
وأخلى كلاف البلد ..  
يتحنى ويعيد .

(يناير ٧١)

منين أجيب للقلوب الطيبة..  
مطرح أمان .  
دى دياب هنا..  
ودياب هناك ..  
والكل كاش في المكان .  
حتى الكلاب ..  
خانت العشره وصبحت ضدنا.  
ماشيه بتتمسح في توب السلطه..  
وتطاطى للسلطان .

(مایدو ٧١)

خلینا بره المعصه ..  
أنا وانتی نتفرج .  
علی ناس عتاوله یحطبوا..  
والباقی بیهرج .  
لأعن الشمال ادهمك ..  
ولا ف الیمین دا یاسین .  
دول یامه من شكلهم...  
لعیبه برائی .  
وبهیة مش همهم..  
داالهم شیئ تانی .  
جایز یكون بدران ..  
مقسوم علی نصین .

(أكتوبر ٧٣)

وجانى النداء ..

كأنه صلاة إخناتون فى الفضاء.

وصوتك بيفرق فى شعر المدى .

ويدخل فى قلبى شعاع ابيضائى ..

يورق كيانى .

تدغدغ شفايفه حدود الأمانى.

دا جانى كأنه ..

هلايل بتسقط سقوط الندى .

ترقرق كدمعة حنين م الفرحة ..

وتلمع فى بحر العيون م الرضا ..

(عبرنا القنال)



يا قلبك ساعتها .  
دموعك خدتها الرياح واتست .  
شفايفك قست .  
وضمت وزمت سنين الألم .  
وغل السنين .  
وغيط العذاب والهزيمة ابتدا ..  
يولع خطوط اللهب والردى .  
خطاوى البياده ..  
تأكد وجود .  
تخللى الحصى فى رمالك شهود .  
أدى احنا هنا .  
وفين اليهود ؟!  
وفين لنجليز ؟!  
عزيزك مروح ..  
لبيته عزيز .

(نوفمبر ٧٧)

(من خاف سلم )  
مين اللى قالها لك ..  
وقولتى عليه حكيم؟  
من خاف دامت ..  
من قبل حتى مايتولد.  
متأخذنيش ..  
مش عايز اعيش ..  
ونا فوق قفايا المستكين ..  
سكين تلم .  
اقتلنى لكن بالصلاة على النبى ..  
متغشنيش .  
وصادقنى الزمن مره على بابك ..  
ونا حافى القدم دامى ..  
وجوايا غريب مدفون .  
بيسألنى :

على فين الخطا رايحه ؟  
ومين بعد الخطا راح اكون ؟  
بتسألني يا زمن عارف ..  
ايه الخافى وإ اللي اتشاف ؟  
يجوز أجهل أنا نفسى ..  
لكن وطنى ..  
انا سره ..  
ونا برضه ..  
انا العراف .

ونا قلبى تحتك بالحمامه ..  
زى بيضة رخ .  
ولما اطخ الكلام ..  
تتكسر القشره .  
وتشوفوا فوق اللسان ..  
شجرة حروف كشره .  
تطرح مع الأيام ..  
بدل الدراع عشره .

(ميم)

معرفةش انك هنا..  
ف القلب .. جوايا..  
إلا ما غربي الزمن..  
ولقيتني ناقص أنا..  
والعمر خطوايه..  
وكل شئ أصفار..  
ملهاش هنا نهايه..  
نمشي بنص القدم..  
ونشوف بورية عين..  
نسمع بوذن الصمم..  
ونقول ياليل يا عين..  
إحنا الخساره لنا..  
وانتى مفيش حاجه..  
ولو بعدنا كلنا..  
ايه يعنى ناقص جيل..

ياما الدفاتر سجلت ..  
ملايين من المواليد .  
وفوق ترابك يندفن ..  
خفرع وبعده فريد.  
يعنى مش احنا الأوله.  
والآخره ..  
لسه بعيد.

.....

.....

(صاا)

صدق اللى قال يا حبيبته :  
إنك هبى للنيل .  
ولولاكى يا طيبه ..  
ما غنت الأراغيل .  
أصل البدايه من هنا.  
والاصل والتأصيل .  
أصل الحضاره من هنا.  
وأفعل التفضيل .

أصل الرسالة من هنا.  
والدعوه والترتيل .  
والعقل أصله من هنا.  
والوحي والتفكير .  
وكل شئ له صلته..  
بالنيل كان مصرى .  
وكل ما يميل صارى الزمن ..  
يعدل شراعه النيل.

.....

.....

(راء)

رمح العدو..  
لما انغرز ف القلب..  
ما متشى .  
وحتى لما انجرح..  
ف الآمه ما سكتش .  
وزمان قرينا حكمته..  
لاكنها ضاعت .



والحكمة كانت :

(تموت لو تحتفى ف بابك )

اضرب عدوك في غيظه..

واتلف له محصوله .

ولو تحس بهوان ..

اشمخ قصاد جارك .

لتهون ف عين الصديق ..

ويقل مقدارك .

ترخص كإنك جمل..

ينباع ف آخر السوق .

ولو يشيل الجبل..

يتقال عليه مسروق.

اضحك ف عز الجفاف ..

الميه حتجيك .

ولو دليلك تاه ..  
مفيش دليل غيرك .  
واياك ف يوم تعتمد..  
إلا على فاسك .  
ولو عليت للسما..  
ما تعالى فوق ناسك .  
خليك مع المعقول..  
واعرف الحكمة:  
موسى حماه النيل..  
وهوه ف اللفه.  
وامك على ميتة..  
حدفت فى يوم الميلاد ..  
الصره ..  
وخلصك .

آن الألوان ترجعى ..  
من رحلة النسيان .  
آن الألوان تخرجى ..  
وتنفضى الأكفان .  
آن الألوان من زمان .  
يا هلترى فاكراه؟  
ولا انتى ناكراه الذات ؟  
وبترفضى الذاكره ؟  
انتى ام خوفو واخناتون ..  
ومسيحه والقولى .  
ضمى الحقيقه وارجعى ..  
شجرة كافور نيلى .  
قبل الزمان ما يقوت ..  
ونكفن المواويل .  
قبل الربيع ما يضيع ..  
ونكسر الأراغيل .

قبل التاريخ ما يدوخ ..  
ونتوه مع المجهول .  
ونقول دى ربح العفن ..  
محت السطور ف الليل.  
ونشوف جدار الهرم ..  
احجار بلا ترائيل.  
دا لسه فيكى الروح ..  
بتبوح بأسرارها.  
والعفه لسه يا بلد ..  
محفوظه أسوارها.  
خللى اللي عدى انتهى .  
لكن اللي جاى لينا.  
خللى اسامينا بصحيح ..  
تبقى على مسمى .

فيكى الحقيقه والكفايه .  
حتى اكثر من احلامنا .  
يبقى انتى ليه ترفعى ..  
رايه بلا معنى .  
رايتك دى راية آمون ..  
ولذك جيوش الشمس .  
واحنا النهارده هنا .  
واحنا اللى كنا الأمس .  
ملناش سوى اسم واحد :  
مصرى ومصريه .  
لا جدى كان فرعون .  
ولا أمى بدويه .

أنا ابن طين النيل..  
والسنت والجميز.  
دنا عزيز العين .. والثنى .  
بس إجوز :  
قلبي العجوز دقته ..  
ابطء من امبارح .  
قدمي الجريح خطوته..  
اتقل من المفروض .  
لكن قادر على بكره وع الموعود.  
ولسايا على جسمي الوتر مشدود .  
ولسه بجود .  
وبفتح ف الصخور ليكى ..  
طريق مسدود.  
وحندي..  
أنا وانتى المدى ونسود.



بلاد الشمس يا (مسرا)  
يا فوق الحد والمحدود.  
يا ناسيه سنوحى وقريتى ..  
الدفاتر سود.  
ومجدتى وعليتى اسامى كثير.  
عبيد كانوا ولا يسوا .  
وكتاب التاريخ نسيوا .  
أو اتناسوا.  
أو اداسوا بنعل أمير.  
أنا المصرى كريم (العنصر الواحد)  
أنا قلب التاريخ كله.  
أنا قدمه.  
أنا الساعد.

ومتواعد..

حنتقابل اكيد بكره.

ولا عمرى انا وانتى حنتباعد.

تمدى ايديكى لاديا ونتصافح .

ونتعانق ونتصارح .

وأقول أحلى ما قال الشعر ف لسانى.

واحضانك..

نسيم بيطفى اشواقى ف احضانى .

ياصفصافى .

وصيف صافى .

ووصفك نفس أوصافى .

وظلمك ليه إنصافى .

في لحظة تخصمى ..

والثانيه بتتصافى .

ولما يئن مجدافى ..

لا بتكشى ولا تخافى .

وإذا اغمق الزمن فينا..

ألا قيكي ..

كأنك شب متعافى .

تخلي شمعتك شمسه.

ووسط الضلمه تنشافي .

ياكشافي .

وحبك بلسمى الشافي .

وحبك فرشي ولحافي .

وحبك ...

لنهار يطلع..

يبان ف عيونك الخافي .

وشئ ف قرارك الغامق ..

نشوفه ف الصباح طافي.

الأحساء ١٩٨٤م

كلام عن الحرب

(١٩٦٧)

الساعة تسعه ونص الصبح..

نزلت من الاتوبيس ..

حسيت وكأني لأول مره ..

بزورك يا سويس.

.....

الشارع نفس الشارع..

الى ما كنتش تقدر تمشى بكتفك فيه ..

والراجل أبوش منحس..

الى الواحد كان يتشائم بيه..

لوقتي بنتمنى نلاقيه..

حتى انشالله يكون ..

واقف ف الشارع وحديه.

.....

بعد ما بردت مواسير الهوزر..

كركر نفسين م الجوزه..

وهو بيضحك قال:

— الصواريخ عماله تظاظي فوق ف الجو..  
والراجل واقف..

على سابع دور ف الهو..

مش عاوز ينزل ..

ونقوله انزل ..يصرخ:

والله ما نازل..

دا شقايا وتعبي وعرقى ودمى ..

ضيعتو انا فيه..

لو جالو صاروخ ..

يتسهدم هو..

وأموت انا من تحتيه.

.....

بعد ما فات القطر عليه ..

شافو بطاقتة ..

فلقو الراجل انه سويسى .

قال واحد م الواقفين :

يا ولداه ..

هربان م الموت لجل قضاه .

قال التانى :

ف السكه الموت..

كان ماشى وراه .

.....

وف يوم ..

واحنا بنلم ف لحم الناس..

فوق الشبايبك .

كان الراديو المش مكسوف بيغنى :

من سحر عيونك ياه .

روحنا من غيظنا ياخلق ..

كسرناه .

.....

قال مش هيه أمريكا ..

الى اتنا القمح هديه ؟

رد عليه :

أيوه .

بعد ما خد بقين م الشاى ..

طب تدینا القمح ازای ..

لما عنیها كانت فیه؟

.....

قال :

خواف خواف خواف ..

وان شافنی الموت ونا خایف ..

لازم حیخاف.

.....

وف ساعة الغاره یا ساده ..

یتداری ضعیف القلب ..

یتاوی ف یطن الخندق ..

یتخندق .

أما الجدع أبو قلب شدید ..

یفتح صدره ف عز الضرب ..

تشجیه الدانه الی تصفر ..

فی فراغ الجو .

تبهرنا ف لیل الحرب الاضواء ..

اشی حمرا وصفرا وخضرا ..



ودى صابت مدنة جامع ..

ودى رايحه لصدر عدو .

.....

لكن الحرب يا سادة خساره ..

وجساره ..

واحنا الوقتى فى ساعة الغاره..

نسمع صفارة الانذار نحتار.

— ادارى .. ادارى .

— والله ما حدارى دا عمر.

— احنا حنستنى نموت ..

ادخل على جوا يا عم .

— شايف الطياره .

اهى لفت من فوق الحاره .

— دا وراها أثنين فانتوم .

— كفاره يا ابو احمد كفاره .

— حصل ايه ؟

— وقعت طياره .

- ممعكشى يا ليثى عقب سجاره ؟
- حنخمس ف الزمن النيله ؟
- حاسس بدماعى ثقيله .
- الدانه بتنزل بتقش .
- اتخن شنابات ف الحرب تكش .
- متخش لجوه يا سماعين .
- حنموت ياخى طظ ..
- ما بلدنا بلعت عنبايه ..
- وشرقانه من حبه رز .
- تعرف يادمتري ياخويا ..
- المخبأ برضه أمان ونضيف .
- فعلا متبيض ومنور .
- دور يا حسين على عود كبريت .
- يظهر نور المخبأ فيه عفريت .
- لأ دى الدانه جت ف عمود النور .
- بس أهى كملت ..
- أصبح قبر بدون تكييف .

وتدق الصفاره أمان ..  
طبعاً مات من مات ..  
ماهو عادى يموت ف الحرب الانسان ..  
والموت موجود من غير الحرب ..  
ف كل مكان .  
لكن زمنا زمان ..  
زمن الالمان ..  
المان الدم الحر ف عصر الغايه ..  
وتموت ف عروق الصمت ..  
آهات الام النحايه ..  
وتموت الاطفال الرضع ..  
ف خيام الزمن الغلطان .



كلام عن الغربية  
(١٩٦٩)

يا صحاب ..

لما بكره حنفترق ..

على مركب الاغراب .

يحمل كلامنا الريح ..

وتروح الذكرى ..

من أرض بكره حنبتدى المشوار ..

وف أول الرحله ..

يتصلب عودى النحيل فوق الشراع ..

ويموت دراعى على مسكت الدفه .

.....

.....

وارجع كما الليل الى زاحف ع البيوت ..

غنوة مقنى ..

من صدر مقطوع النفس..

أنعس على الأبواب ..

أدق التار ..

وأتساعل كما النداب.

تسحلني سنين الغربه ف الطرقات..

أتلوى بلا نغمه ..

تتشنج النايات ..

(شمس العصارى غابت ..

ياللى بلادك بعيده )

.....

تزعق العجلات على القضبان..

تتحرك الياقظه الجديده ..

(محطة البلده السعيده )

لكن انا واقف على الشباك ..

أبص هناك ..

ألمح وشوش الناس..

بلا تتفاصيل..

شجرة كافور وقت الاصيل ..

يتساوى لون الفرع والورقه.

.....

أتشد في لحظة كلام الخلق.  
الكلمه على طرف اللسان.  
ملعون يا رتم العجل على القضبان.

.....

نامت الخلق السعيده .  
مالت الدماغات على الاكتاف..  
مالت الاكتاف على الجدران.

.....

ع البعد ..  
الشمس سايحه في دمها..  
ترمح خيول الليل..  
على أرض النهار.  
في اللحظة دي بالذات..  
مات الاصيل .  
عم السكون.  
رتم العجل ملعون.  
مركون على الحيط المسافر يا غريب..  
مركون على الحيط المسافر يا غريب.



## أصوات (القاهرة ٢٠٠٠)

صوت واحد :

=====

١- ماشي بطبطب ع المسا ..

وارسم ورايا خطوط .

وبشوط في طوب الطريق ..

وا بعد شواشى الموت .

واغنى جواً كابوس ..

من غير نعم ولا صوت .

.....

أسلى نفسى بنكتين ..

أضحك ...

يرد م الجانبين ..

على ضحكى العفاريت .

صوتين :

=====

١ - عينك في عيني .

٢ - لا .

١ - مع إنك القاتل ؟

٢ - تحرم عليه عنيك ..

يا حزن يا مقتول .

## ثلاثة أصوات:

=====

١- بحلم ....

٢- ما تحلم هو أنا بالك ؟

٣- حبت تنادى ...

طلعت على مدنه.

١- أنا حلمى بيك وانت فى بالى .

٢- ميخصنيش .

٣- وقعت ف آخر سلمه .

١- ف الحلم ديما ينكسر..

ما كان على بالى .

أربعة أصوات :

=====

١- قالت عزيزه لامها :

٢- حنتك سوده .

١- قالت :

٤- بحبه والهوا زى الشيطان وسواس .

٣- الحنه مش للفرح .

٢- أمال لأيه يا مه ؟

٤- مرق بسهمه ف دنيتي ..

احساس ورا احساس .

٣- الحلم يلزم له صلا .

ووضوه بالحنه .

٤- الجنه أقرب لنا..

من لحظة البرجاس .

مع صلاح عبد الصبور  
(القاهرة ٢٠٠١)

( الناس فى بلادى طيبون )

.....

.....

يا صلاح ..

مفضلش م الطيبه سوا الصمت المباح .

وخلف أبواب البيوت ..

فرش السكوت ..

حصيرة الأحلام ونام ..

كل البشر ويا الكلاب ..

اللي أنقطع منها الرجا حتى النباح .

(هذا زمن الحق الضائع)

الراوى كان حيقول .. سكت ..  
لما انقطع قوسه ..  
وتلتلف مستمع ..  
على صوته بيدوسو..  
نام الوتر فوق البدن مرخى..  
.....

أرخى الستاره .. النور..  
يا حلم دوخنى .  
.....

نبشت أيدى الحفارين ..  
قبر الكلام والوجع ..  
الماضى م الماضى رجع ..  
أشباح ورا أشباح .  
.....

خلونا نكره بقى ..  
نكره عشان نرتاح .  
.....

قطع النياتى النفس ..  
لما ابتدا المداح .

(ومات ذاك الوديع

دونما احتفال)

ما عدى فيه حلاج .

كل المآذن زنازن كرهت الأصوات .

كل اللي فايت من هنا..

دقنه على صدره ..

ما عدا واحد نام..

ومخدته فجره .

قالوا عليه دامت .

بكت عزيزه نزل ..

ويا الدموع نئين .

وفين ألقى الوطن ..

بين ضبتين تمساح .

(الرخ مات - فاحترس - الشاه مات)

مات الملك ..

على رقعة الشطرنج .

عاش الملك ..

مع الهتاف والصنج .

شربت حبيته البنج ..

نامت ع الشعور .

رشوا الجسد بالورد ..

وأدوا للكمبرس دور .

....

وأنت يا صاحبي خلاص ..

راحت على دورك ..

لا تحت منك وطن ..

ولا اللي فوق دى سماك .

مات الملك ..

بس إنت باقى وحي .

خللى ف إيدك علم ..

يمكن ف يوم تغرسه ..

على وطن من ضى .



(في الفجر يا صديقتي تولد نفسى من جديد)

- مش حيرجع ..
- فارس الحلم القديم .
- دا تشاؤم ؟!
- إحنا أزمطنا الحقيقه .
- ضهرنا لبكره وبنشوف اللى فات .
- فارس الأحلام ما جاش ؟
- هو مات ؟
- أبوه مات .
- وفي جنازته ..
- كان بيحبى طفل بكره ع الرفات .
- فك شرطان المحنط ..
- كان مزققط .
- اكتشف فى اللعب سره .
- وف غياب البكايين ..
- خبى سره جوا قلبه .

واختفی .

- یعنی راجع للبلد ؟

- لا داجای .

أصله م السر اتولد .

(ملاحنا اسلم سؤر الروح قبل أن نلامس الجبل)

كل ليله بتنتظر..  
تحت شباك الامل يجى..  
لسه مجاش ؟  
كل ليله والقمر..  
يدخل الشباك بنور..  
يحجبه الخفاش .  
كل ليله والاميره..  
تنتظر.

....

يضحك الحشاش :  
خدلك نفس وانغمس..  
وانغرس .  
جوا قطر الحشر في الرحله الاخيره .  
- والاميره ؟!  
سيبها تشبع إنكسار .  
- تفتكر ممكن حيي .. تفتكر ؟!  
- الاميره بتنتحر .  
لما طال الانتظار.

## أولا الأعمال المسرحية :

### التأليف المسرحي :

- مسرحية " الغبار " ١٩٦٥ فرقة السويس إخراج عبدالهادى الصيفى.
- أوبريت "شمس العصارى" ١٩٦٨ فرقة المنوفية الاستعراضية إخراج توفيق عبد القادر.
- أوبريت "مवाल بلدنا" ١٩٦٩ فرق السويس الفنية إخراج محمد الخميسى.
- العرض الغنائى الشعري "هنا القاهرة " ١٩٧٣ فرقة السامر إخراج عبدالرحمن الشافعى.
- العرض الغنائى الشعري "السويس حبيبتي" ١٩٧٣ فرق السويس الفنية إخراج د. حسين سمير.
- المسرحية الشعرية " الحممام على برج أكتوبر " ١٩٧٤ منتخب جامعة القاهرة إخراج كمال يس.
- أوبريت " مصر الحبيبه " ١٩٧٤ جهاز الشباب والرياضة إخراج محمد الخميسى.
- أوبريت " مصر أمنا " ١٩٧٥ جهاز الشباب والرياضة إخراج حسين أمين.
- العرض الغنائى " أيوب المصرى " ١٩٧٦ فرقة الآلات الشعبية إخراج حسن عبد السلام.

- مسرحية " مصطفى البشتيلي " ١٩٧٦ فرقة بشتيل إخراج عبد العزيز عبد الظاهر.
- المسرحية الشعرية " الغول ٧٧ " ١٩٧٧ فرق السويس الفنية إخراج د. حسين سمير.
- المسرحية الشعرية " سعد اليتيم " ١٩٧٧ فرقة تلا إخراج نبيل يحيى.
- المسرحية الاستعراضية " المراجيح " ١٩٧٨ فرق السويس الفنية إخراج د. حسين سمير.
- المسرحية الشعرية " موال زهران " ١٩٧٨ فرقة المنوفية إخراج إميل جرجس.
- العرض الغنائى الشعرى " سلام سلاح " ١٩٩٧ فرقة الاسماعيلية إخراج محمد حسن.

#### الأغاني والأشعار المسرحية :

- مسرحية " كان ياما كان " ١٩٧١ فرق السويس الفنية إخراج حسن عبدالسلام.
- مسرحية " شرخ فى جدار الخوف " ١٩٧٢ فرقة الجيزة إخراج عبدالرحمن الشافعى.
- مسرحية " على الزيبق " ١٩٧٣ مسرح السامر إخراج عبدالرحمن الشافعى.

- مسرحية " حكاوى الزمان " ١٩٧٤ مسرح السامر إخراج عبدالرحمن الشافعى.
- مسرحية " أدهم الشرقاوى " ١٩٧٥ إخراج ناجى كامل.
- مسرحية " القرية المفقودة " ١٩٧٦ مسرح السامر إخراج حسن عبدالسلام.
- مسرحية " زوربا المصرى " ١٩٧٦ مسرح الطليعة إخراج محمود الألفى.
- أمسية زكريا الحجاوى " عاشق المداحين " مسرح السامر إخراج عبدالرحمن الشافعى.
- مسرحية " دائرة الطباشير " ١٩٧٨ إخراج ناجى كامل.
- مسرحية " المتوحشة " ١٩٧٨ فرقة كفر الشيخ إخراج رؤوف الأسيوطى.
- مسرحية " بيت جحا " ١٩٧٩ فرقة قها إخراج أحمد عطيه.
- مسرحية " الفاس فى الراس " ١٩٧٩ فرقة البراجيل إخراج د. عادل العليمى.
- مسرحية " أن الألوان " ١٩٨٠ الفرقة النموذجية إخراج عبدالغفار عوده.

ثانيا الأعمال التليفزيونية :

- مسلسل " الدوائر " ١٩٩٦ التليفزيون السعودى إخراج جمال قاسم.

- أغاني وأشعار مسلسل " الوجه الآخر للقمر " إخراج أحمد خلوصى.
- أغاني مسلسل " أيام المنيرة " إخراج وفيق وجدى.
- أغاني مسلسل " سوق الرجال " إخراج عبد العزيز السكرى.

#### ثالثا الأعمال الغنائية :

- أغنية " ساعات .. ساعات " غناء على الحجار.
- أغنية " حبي ليكى " غناء محمد رؤوف.

#### رابعا الأعمال الاذاعية :

- مجموعة كاسيت " أهلا شمس " تمثيل فرقة استوديو الممثل إخراج محمد صبحى.

#### خامسا الأعمال المطبوعة :

- مسرحية " الديك والطايبه " الهيئة العامة لقصور الثقافة.
- " مصطفى البشتيلى " جامعة القاهرة.

رقم الإيداع : ٨١٣٨ / ٢٠٠٢

شركة الأمل للطباعة والنشر  
(مورافيتلى سابقاً)








16  
8

Bibliotheca Alexandrina



1469030

الثمان خمسون قرشا  
الأمل للطباعة والنشر